



Fasnacht 2008

Radio Quasilisk

Fasnachtsnochrichte

Wättervorhärsaag:

Z'Basel schneits Röppli.
zwscheduure cha's au Dääfeli hagle, aber au die
sunnegrifte Orangsche g'seht me am Nomittag.
D'temperatur betreit je nach Gmietszuestand zwische
0 und 40 Grad. So bliibt's bis am Donnschtigmorge.
* * * * *

Verkehrsmittailig:

In dr Innerstadt herscht teilwys stockende Kolonne-
Verkehr, vor allem beroffe sin d'Wettstaibrugg, die
Mittleri Brugg bis Muba und im Grossbasel vom
Märtplatz via Seibi bis zum Äscheplatz.
Dr Tramverkehr het uff däne Abschnitt miese
ygestellt wärde.
* * * * *

Noochrichte:

In dr Stadt Basel isch s'Fasnachtsfieber uusbroche.
Das Fieber isch sehr aasteggend, duurt aber
meischtens numme drey Dääg. Z'erkenne isch es
an de (trotz Vermummigsverbot) Larve und Goschdym
vo de aagsteggte. In dr Regel trait me kaini
bliibende Schädle dr voo.

In dr Nacht uf hyte sin vuyli Extrazyg am Bahnhof
aacho. Vor allem us Ziri. Hoffentlig wisse die
Zircher, dass mir kai BÖÖG verbrenne!

Hyte morge am vieri isch in dr Innerstadt e teilwys
Stroomunterbruch gsi. Gliggligerwys hän vuyli ihr
aiges Liechtli drbii gha

Vom Radio Pilatus hän mir erfaare, dass an de
negschte drey Dääg e huffe Guggespione z'Basel
unterwäggs sy wärde. Si chömme cho spioniere,
damit si nägcht Joor wieder e "rüüdig" schöni
Fasnacht hän.

Us Regierigskreise hän mir ändlig vernoo, worum
S'Roothuus farbigi Ziegel het.
Damit's nyd ine rägnet.

Dr ainzig Röpplihärsteller vo dr Schwyz isch usver-
kauft. D'Basler Fasnacht het so vuyli Röppli wie scho
lang nümme kauft. D'Lager sin leer. D'Firma us
Näfels dailt mit, dass bis zur Fasnacht 2009 d Lager
wider g'fyllt sy wärde.

Zem Schluss no e wichtigi Mitdailig:
Z'Basel hebt me vom Bode numme Dääfeli und
D'Orangsche uff. D'Röppli losst me lyge

Danggerscheen !!!!!!!

E scheeni Fasnacht und bis am 2. Merze 2009
Eyri Vogese Rueche



Fasnacht 2008

Radio Quasilisk

Fasnachtsinfo

Tourismus Basel dailt mit:

In dr Stadt sin alli Hotel uusbuecht.
Es isch drum mit eme vermehrte vorchoo
vo Zircher und Schwoobe z'rächne!!!
* * * * *

Au us Bärn sin an dr Fasnacht vuyli Lyt a'zträffe.
Bitte mit däne langsam und lyyslig reede, will sy
no Noochwehe vo ihrer eigene Fasnacht hänn.
* * * * *

D'Stadtreinigung deilt mit, dass vom Mändig am
vieri bis am Donnschtig am vieri niemer unterwäggs
isch, zum Buesse verdaile wägem Littering.
Das haisst, in däre Zyt derf me in dr Innerstadt au
eppis uff e Boode g'heie.
* * * * *

In näggschter Zyt muess in Bärn, Lieschtel und Basel
vermeert mit Hoochwasser g'rächnet wärde.
Das, will in d'Regierig wieder vuyli Wasserchepf
g'wählt worde sinn und ihri Wahlversprüche dr Bach
ab löön.
* * * * *

S'Fasnachtscomité dailt mit, dass dr Blagetteverkauf
per sofort bis ändi Hornig verlängeret wird.
Das, will me numme fynf Wuche Zyt fiir e Verkauf
g'ha het und sy no vuyli im Lager hänn.
* * * * *

Wie us Fasnachtskreise verluuetet, isch bim Comité
e Gsuech ygange, d'Fasnacht uf vier Dääg z'verlängere.
Das Gsuech wird vo dr Basler Regierig unterstytzt,
will die während ihrer Amtszyt nie ihr woors G'sicht
zaige. Vo dr Wirtschaft isch no kai Stellignam
z'becho gsi, will alli an dr Fasnacht sin.
Nur us de Baize isch drfyr e mehrhaitlich positiv's
Echo choo!!! Au mir wäre drfyr.
* * * * *

D'Frau Fasnacht het's elei sy satt. Si suecht drum
e nätte Maa via s'Radio Quasilisk.
Er sött eppe in ihrem Alter sy und alli Joor an de
scheenschte drey Dääg mit uf d'Stroos cho.
Interessierti mälde sich bitte bim Fasnachtscomité
oder bim Radio Quasilisk
* * * * *

E Mitdailig vo dr Polizei:
D'Narrefreiheit isch nid gränzeloos. D'iend bitte frydlig
sii und de Brauereie nid zunene Rekordgwynn verhälffe.
Dringg massvoll und nid massloos.
S'stähle isch au während dr Fasnacht verbotte und wird
azeigt!!!!!!
* * * * *

Danggerscheen !!!!!!!

E scheeni Fasnacht und bis am 2. Merze 2009
Eyri Vogese Rueche